



Broj: UP-06-26-1-023-5/21
Sarajevo, 15.9.2021. godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (2), a u vezi sa članom 14. Zakona o konkurenciji („Službeni glasnik BiH“, broj 48/05, 76/07 i 80/09), rješavajući po Prijavi koncentracije privrednog subjekta MOL Magyar Olaj- és Gázipari Nyilvánosan Működő Részvénytársaság, Október huszonharmadika u. 18, 1117 Budimpešta, Mađarska, podnesenoj putem punomoćnika, advokat Karabdić Kerim, Hadži Idrizova 20,71000 Sarajevo, zaprimljenoj dana 22.6.2021. godine pod brojem: UP-06-26-1-023-1/21 na 92. (devedesetdrugoj) sjednici održanoj dana 15.9.2021. godine, donijelo je

Z A K L J U Č A K

1. Odbacuje se Prijava koncentracije privrednog subjekta MOL Magyar Olaj- és Gázipari Nyilvánosan Működő Részvénytársaság, Október huszonharmadika u. 18, 1117 Budimpešta, Mađarska, radi nepostojanja obaveze prijave koncentracije u smislu člana 14. stav (1) Zakona o konkurenciji.
2. Podnosilac predmetne prijave, obveznik je plaćanja administrativne takse u iznosu od 1.000,00 KM (slovima: hiljadu konvertibilnih maraka) u korist Budžeta Bosne i Hercegovine.
3. Ovaj Zaključak bit će objavljen u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (dalje u tekstu: Konkurencijsko vijeće) je dana 22.6.2021. godine pod brojem: UP-06-26-1-023-1/21, zaprimilo Prijavu koncentracije (dalje u tekstu: Prijava), podnesenu od strane privrednog subjekta MOL Magyar Olaj- és Gázipari Nyilvánosan Működő Részvénytársaság, Október huszonharmadika u. 18, 1117 Budimpešta, Mađarska, kao matičnog društva MOL grupe (dalje u tekstu: MOL, Sticatelj ili Podnosilac), u vezi sa namjeravanim sticanjem indirektna, isključive kontrole nad društvom OMV SLOVENIJA, trgovina z nafto in naftimi derivati, d.o.o., sa sjedištem na adresi Ulica 15. maja 19, 6000 Koper, Republika Slovenija, (dalje u tekstu: OMV Slovenija ili Ciljno društvo).

Prijavu je, kao zastupnik Podnosioca, podnio advokat Karabdić Kerim, Hadži Idrizova 20,71000 Sarajevo (dalje u tekstu: Podnosilac prijave).

Konkurencijsko vijeće je dana 9.7.2021. godine pod brojem UP-06-26-1-023-2/21, od strane Podnosioca zaprimilo samoinicijativnu dopunu predmetne Prijave.

Podnosilac prijave je naveo, u smislu člana 30. stav (2) Zakona o konkurenciji („Službeni glasnik BiH“, broj 48/05, 76/07 i 80/09) (u daljem tekstu: Zakon), da se pored BiH, ova transakcija prijavljuje i u sljedećim jurisdikcijama: EU, Srbija, Crna Gora i Slovenija (u slučaju da Evropska komisija prenese nadležnost na slovensko tijelo za zaštitu konkurencije).

Konkurencijsko vijeće je analizom Prijave utvrdilo da je ista podnesena u smislu i u skladu s članom 16. stav (1) Zakona, obzirom da pravni osnov predmetne koncentracije čini Ugovor o kupovini udjela, zaključen 7. juna 2021. godine između društva OMV Slovenija kao prodavca i društva MOL Slovenia

Downstream Investment B.V., kao kupca, kojim će ustvari MOL grupa steći ¹(..)** udjela u Ciljnom društvu.

Nakon što je utvrdilo da je podnesena prijava uredna i kompletna u smislu odredbi Zakona o konkurenciji («Službeni glasnik BiH», br. 48/05, 76/07 i 80/09) i Odluke o načinu podnošenja prijave i kriteriji za ocjenu koncentracija privrednih subjekata („Službeni glasnik BiH“, broj 34/10), Konkurencijsko vijeće je dana 14.9.2021.godine, podnosiocu prijave izdalo Potvrdu broj: UP-06-26-1-023-3/21, o urednoj i kompletnoj prijavi u smislu člana 30. stav (3) Zakona.

1. Učesnici predmetne koncentracije

Učesnici koncentracije po predmetnoj prijavi su privredni subjekti: MOL Magyar Olaj- és Gázipari Nyilvánosan Működő Részvénytársaság, Október huszonharmadika u. 18, 1117 Budimpešta, Mađarska i OMV SLOVENIJA, trgovina z nafto in naftimi derivati, d.o.o., sa sjedištem na adresi Ulica 15. maja 19, 6000 Koper, Republika Slovenija

1.1 Privredni subjekt MOL Magyar Olaj- és Gázipari Nyilvánosan Működő Részvénytársaság, Október huszonharmadika u. 18, 1117 Budimpešta, Mađarska, kao sticatelj.

Privredni subjekt MOL Magyar Olaj- és Gázipari Nyilvánosan Működő Részvénytársaság, sa sjedištem na adresi Október huszonharmadika u. 18, 1117 Budimpešta, Mađarska, registrovano je kod Gradskog suda u Budimpešti, registarski broj 01-10-041683, kao matično društvo MOL grupe.

MOL je integrisana međunarodna naftna i plinska kompanija, čije su glavne djelatnosti: istraživanje, proizvodnja i prerada sirove nafte, distribucija naftnih derivata kako na veleprodajnom tako i na maloprodajnom nivou, proizvodnja i prodaja petrokemijskih proizvoda, istraživanje i proizvodnja prirodnog plina i prenos prirodnog plina u Mađarskoj.

1.1.1 Povezana društva podnosioca prijave

Direktni sticatelj u predmetnoj transakciji je društvo MOL Slovenia Downstream Investment B.V., registrovano u Holandiji, koje je u 100% vlasništvu MOL-a i dio MOL Grupe.

Na strani Sticatelja, još jedno društvo iz MOL grupe, INA d.d. Zagreb (dalje u tekstu: INA), će učestvovati u preuzimanju udjela Ciljnog društva. U dokumentu koji predstavlja pravni osnov koncentracije, Ugovoru o kupovini udjela zaključenog dana 7. juna 2021. godine, predviđeno je da, po zatvaranju transakcije, (..)**.

Društvo INA nalazi se pod punom kontrolom MOL-a i u potpunosti je konsolidovano u MOL grupu. INA je vodeća naftna kompanija u Hrvatskoj i jedan od glavnih igrača na regionalnom tržištu u oblasti istraživanja nafte i plina, proizvodnji i preradi nafte i distribuciji nafte i naftnih derivata.

U Bosni i Hercegovini, MOL grupa je prisutna preko nekoliko svojih zavisnih društava, aktivnih u veleprodaji i maloprodaji različitih vrsta goriva.

U svom godišnjem izvještaju za 2020. godinu, MOL kao svoja zavisna društva navodi četiri društva registrovana u Bosni i Hercegovini: INA BH d.d. Sarajevo, Crosco International d.o.o. Tuzla, Holdina d.o.o. Sarajevo („Holdina“) i Energopetrol d.d. Sarajevo („Energopetrol“).

¹(..)** podatak predstavlja poslovnu tajnu

Od ovih društava, jedino su Holdina i Energopetrol zaista aktivni na tržištu – društvo Croscos International d.o.o. je likvidirano u 2020. godini, dok je likvidacija društva INA BH d.d. u toku.

Holdina je društvo koje posluje u okviru INA grupe i u 100% je vlasništvu INA-e. Društvo je aktivno u veleprodaji i maloprodaji nafte i naftnih derivata na čitavoj teritoriji BiH. Holdina opslužuje svoje veleprodajne kupce širom BiH. Maloprodajnu mrežu Holdina-e čini 51 benzinska stanica na cijeloj teritoriji Bosne i Hercegovine.

Energopetrol je društvo koje također posluje u okviru INA grupe. Pretežno je aktivno u oblasti maloprodaje nafte i naftnih derivata, dok u oblasti veleprodaje u smislu dostave goriva kupcima, nije aktivan. Posjeduje mrežu od 54 benzinske stanice na čitavoj teritoriji Bosne i Hercegovine.

1.2 Privredni subjekt OMV SLOVENIJA, trgovina z nafto in naftimi derivati, d.o.o., sa sjedištem na adresi Ulica 15. maja 19, 6000 Koper, Republika Slovenija, kao ciljno društvo

Privredni subjekt OMV Slovenija, društvo registrovano u Sloveniji, trenutno se nalazi pod kontrolom OMV grupe, uz nekontrolni udio koji u Ciljnom društvu posjeduje INA, koja je dio MOL grupe.

Glavna djelatnost društva OMV Slovenija je maloprodaja goriva preko svoje mreže od 120 benzinskih stanica kojima upravlja ili OMV ili njegovi partneri-zakupci. Društvo OMV Slovenija je također aktivno u oblasti veleprodaje goriva, tako što snabdijeva pojedine krajnje kupce u Sloveniji i Hrvatskoj, kao i u oblasti veleprodaje bitumena i lož ulja.

Društvo OMV Slovenija je na tržištu Bosne i Hercegovine prisutno u marginalnom obimu.

2. Pravni okvir ocjene predmetne koncentracije

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona i Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, broj 34/10) (u daljem tekstu: Odluka).

3. Pravni osnov i oblik koncentracije

U podnesenoj Prijavi, podnosilac kao pravni osnov predmetne koncentracije navodi Ugovor o kupovini udjela, zaključen 7. juna 2021. godine između društva OMV Slovenija, kao prodavca i društva MOL Slovenia Downstream Investment B.V. Amsterdam, Holandija, kao kupca.

Podnosilac smatra da transakcija predstavlja koncentraciju putem sticanja većinskog udjela u ciljnom društvu, putem koje će MOL grupa, preko svojih zavisnih društava, u konačnici steći (..)** udjela u Ciljnom društvu i vršit će nad njim pojedinačnu (isključivu) kontrolu.

Sticatelj dakle preko svog 100% zavisnog društva MOL Slovenia Downstream Investment B.V., Amsterdam, Holandija, navedenim ugovorom stiče (..)** udjela u Ciljnom društvu, koji su trenutno u vlasništvu OMV-a.

Prije Transakcije, Sticalac već posjeduje (..)** udjela u Ciljnom društvu, preko svog zavisnog društva INA.

Predviđeno je da, po zatvaranju transakcije, (..)**.

U svakom slučaju, s obzirom na to da su i INA i MOL Slovenia Downstream Investment B.V. dio MOL grupe, takva promjena u vlasničkoj strukturi ne bi dovela do promjene kontrole u smislu zakona.

Shodno ovome, nakon Transakcije, Sticatelj će svakako indirektno posjedovati (..)** udjela u Ciljnom društvu i vršit će isključivu kontrolu nad njim.

Slijedom navedenog, pravni oblik predmetne koncentracije jeste sticanje kontrole nad privrednim subjektom, kupovinom većine dionica, u smislu odredbi člana 12. stav (1) tačka b) pod 1) Zakona.

4. Relevantno tržište

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu, relevantno tržište obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

MOL grupa je u BiH aktivna u prodaji naftnih derivata (motorni benzin, dizel gorivo i ukapljeni naftni plin), kako na maloprodajnom tako i na veleprodajnom nivou.

Na osnovu podataka dostavljenih u predmetnoj prijavi, kao relevantno tržište u svrhu ocjene predmetne koncentracije, određuje se tržište maloprodaje i veleprodaje naftnih derivata na cijeloj teritoriji Bosne i Hercegovine.

5. Ocjena koncentracije

Zakon članom 14., kao i Odluka o načinu podnošenja prijave i kriterijumima za ocjenu koncentracija („Sl.glasnik BiH“, broj: 34/10) članom 2., propisuju, da su privredni subjekti sa sjedištem i prebivalištem u inostranstvu, koncentraciju dužni prijaviti Konkurencijskom vijeću Bosne i Hercegovine, ukoliko ukupni godišnji prihod svih učesnika koncentracije na svjetskom tržištu iznosi 100 miliona KM i ukupni godišnji prihod svakog od najmanje dva učesnika koncentracije na tržištu Bosne i Hercegovine iznosi najmanje 8 miliona, ili ako je njihov zajednički udio na relevantnom tržištu veći od 40%.

Ukupni godišnji prihodi privrednih subjekata učesnika koncentracije i njihovih povezanih društava, na dan 31. decembra 2020. godine, prikazani su u Tabeli 1., radi utvrđivanja postojanja uslova za obavezu prijave predmetne koncentracije:

Tabela 1.

Red. br.	Naziv privrednog subjekta	Prihod na tržištu u BiH	Prihod na svjetskom tržištu
01.	MOL Grupa	(..)**	(..)**
02.	Ciljno društvo	(..)**	(..)**

Izvor: podaci iz Prijave

* .. (..)**

Godišnji prihodi učesnika koncentracije predstavljaju ukupne prihode (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i

Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekata.

Prema prikazanim podacima, učesnici koncentracije nisu ispunili uslov ukupnog godišnjeg prihoda, tj. nemaju ostvaren ukupni godišnji prihod na tržištu u Bosni i Hercegovini u smislu člana 14. stav (1) tačka b) Zakona.

Podnosilac prijave dostavio je Konkurencijskom vijeću procjenu tržišnih udjela učesnika koncentracije i njihovih konkurenata na označenom relevantnom tržištu u 2020. godini, kako slijedi:

Tržište maloprodaje naftnih derivata u BiH

Tabela 2.

Učesnik na tržištu	%
GazpromNeft	(..)**
HIFA Group	(..)**
Optima	(..)**
Nešković	(..)**
TI OIL/TISKO/AURO	(..)**
MOL grupa	(..)**
Ciljno društvo	(..)**
Nezavisne stanice („white pumpers“)	(..)**
Ukupno:	100,00

(podaci predstavljaju procjenu Podnosioca na osnovu broja maloprodajnih lokacija)

Tržište veleprodaje naftnih derivata u BiH

Tabela 3.

Učesnik na tržištu	%
HIFA Oil	(..)**
HIFA Petrol	(..)**
MOL grupa	(..)**
Optima	(..)**
Petrol	(..)**
AGS	(..)**
Ostali:	(..)**
Ciljno društvo	(..)**
Ukupno:	100,0

Podnosilac prijave u istoj navodi, da bi po njegovoj procjeni, te na osnovu gore prikazanih podataka, nakon provođenja predmetne koncentracije, tržišni udjeli učesnika koncentracije na tržištu maloprodaje i veleprodaje naftnih derivata u BiH, ostali suštinski nepromijenjeni – udio MOL grupe bi se samo neznatno uvećao za tržišni udio Ciljnog društva, koji je tek nešto iznad (..)**.

Uzimajući u obzir sve naprijed navedeno, ocijenjeno je da predmetna koncentracija neće rezultirati promjenama u već postojećem tržišnom učešću učesnika koncentracije, odnosno došlo bi do neznatnog i zanemarljivog povećanja istog.

Smatra se da učesnici koncentracije nisu ispunili uslov iz člana 14. stav (1) tačka b) niti u pogledu zajedničkog tržišnog udjela na relevantnom tržištu u Bosni i Hercegovini.

Na osnovu naprijed navedenog, utvrđeno je da privredni subjekti nisu bili u obavezi podnijeti prijavu koncentracije u smislu člana 14. stav (1) Zakona, te je odlučeno kao u dispozitivu ovog Zaključka.

6. Administrativna taksa

Podnosilac Prijave na ovaj Zaključak, u skladu sa članom 2. Tarifni broj 108. tačka c) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, broj 30/06, 18/11 i 75/18) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Zaključka

Predsjednik

Dr. sc. Amir Karalić